

# Eta macartane ema Apóstole Pablo mayehe ema machamuri FILEMÓN

---

<sup>1</sup>Nuti Pablo tapresuchaquenenuhi eta néhisirahi ema Jesucristo, puiti nuchachane ema Timoteo eta vicajureravihi eta carta piti Filemón, vichamurivihi vémunaruviquenehi tayehe eta vématanerepianahi. <sup>2</sup>Vémechajisihavare namutu ena vichamurianahi tíurujicavarahanahi te pipena. Péchajisinhavavare esu vichamuri Apia, émapa ema Arquipo, vicompañeroquenehi muraca tayehe eta vématanerepianahi. <sup>3</sup>Nuvaraha macatajicahehinehi ichape ema Tata Vicaiyaquene, émapa ema Viáquenu Jesucristo. Nájaracahehinehi táurivaina eta epanereruana.

## Eta máurivahi ema Filemón

<sup>4</sup>Néchaviparaca te nuyujarasirana, nuhasulupayachahi ema Viya. <sup>5</sup>Taicha nusamairiricahi eta pímiyanirávahi pémunaca ema Viáquenu Jesús, péhicahi yátupi. Pémunacahivare namutu ena machanerana ema Viya. <sup>6</sup>Nuyaseuchavacahi me Viya nayehe namutu ena téhicavianapaipahi táichavenehi eta náimairahi eta pisuapirahi yátupi. Nuvaraha nácaicutiaraqunenaini muraca tamutu eta táuriqueneana májjararuhavianahi ema Cristo Jesús. <sup>7</sup>Ichaperinehi eta núrismurevahi picha piti nuparape. Tijarahinehi picha te nusamure eta nusamairirisirahí eta pímiyaniravahi pémunacavaca yátupi ena vichamuriana, étapa eta picurismurechiravacahi ichape éna.

## Ema Pablo máechejiucha ema Onésimo mayehe ema Filemón

<sup>8-10</sup>Tiuri puiti, nuvaraha néchajiucha ema Onésimo. Picatajicanu piperdonachinanu éma. Núti yátupiquenenuhi mayehenuhi apóstole ema Cristo. Tituparacanu hinéni nuvanecavihiní. Étasera eta vémunasiracacahi, nuyaseacavi nuti paure ichavica, nucaerataquenehi puiti máichavenehi ema Cristo. Puiti éma, nuchichahi némunaruquenehi te juca cárcel taicha éma téhichaviripa eta visuapirahi ema Jesús.

<sup>11</sup> Ema maca Onésimo, cape juca másinequenehi, vahi máitaurahini eta picamusurairahi. Tijunahivare. Púitiserá éma, ichaperinehi eta máitátiranuhi. Eta máitátiranuhi núti tacutiyare eta máitátiraviyareva píti apana. <sup>12</sup> Puiti névatacayare éma eta ara piyehe. Picatajicanu pijacapanuyare táimicutijiricava nútinayarehi nítecapauchavi piyehe. <sup>13</sup> Nuvarahahineni mánasihini eta ani nuyehé. Émainahini pítsivainahini eta pivairairahi píteca píátinuya eta návihairahi te juca cárceI táichavenehi eta nucameta-rairuirahi eta máechajiriruvana ema Viya. <sup>14</sup> Nuvarahahineni níminasicha éma, nucuchapahisera tájahapuca picayemayare píti. Váhisera nuvaraha nupamicavi eta juca picatajisiránuya, nucuchapayare eta pijacapanuyare. Nuvaraha étachucha tásihaqueneharehi eta táurivaina eta pipanereru. <sup>15</sup> Táitaurevaquene tijunijicavihi ánipi ema Onésimo. Émarichuserapuca jácáni ema Viya tásihahi máisapahi eta macaheyarehi ema Onésimo. Púitiserá tétupiricavapa éma. Márajapainapa tichavayare eta ara piyehe, apajarahinapa eta máitátiraviya. <sup>16</sup> Váipa tácutimahi cape juca másinequenehi. Puiti pímahainapa eta máurivayare macamunucarevayare eta piyehe, taicha váchupa puiti vichamuripahi éma te mavahuana ema Viáquenu. Núti, ichape eta némunasirahi ema maca. Énénapa picaheyare píti apanava, tiápajucavainapaipa eta pémunasiraya ema maca.

<sup>17</sup> Te yátupina pémunacanu eta nuchamurivírahí, pijacapanuyare éma táimicutijiricava nútinayarehi pijacapa. <sup>18</sup> Te tatiarihinapuca eta máejecapiravahi piyehe, ticantevehipuca, nútinarine picobracha. <sup>19</sup> Nuvachachaviyare núti. Nuti Pablo, nútiquenehi nájuchahi eta nufirmachirahi puiti eta nuvachachiraviyare. Nuvarahahinéni némechavi píti apana eta pintevehi nuyehé eta nucatiuchiravihi. <sup>20</sup> Tiuri, nuparape, picatajicanuchaha eta juca nuyasearuvíhi táichavenehi eta nucachamurivirahi mayehé ema Viáquenu. Picurisamuréchanuya.

<sup>21</sup> Németeaca vahi táéñamavacare eta juca pisuapiranuyare. Eta tacache, nucajurevíhi puiti. Taicha néchahivare eta vahi tácarichuimahi pítauchaya eta juca nuyasearuvianahi. Tatiarihiyare jácáni apanayare píjararuvanayare píti tásihaquenehare te písamure. <sup>22</sup> Énerichuvare nuvaraha pétupirisinanuya eta nítecapihaya. Étanecha nucuchapahi eta tasamacarevaina eta eyujaracasana me Viya eta nútujisiravaina nítecapauchaha.

### **Eta táichecuaráqui eta máechajiriruva ema Pablo**

<sup>23</sup> Téchajicavi ema Epafra, ema nucompañerohi te juca cárceI, tapresuchaquenehivare ema apana eta véhisirahi ema Jesucristo. <sup>24</sup> Énerichuvare téchajicaheana ena apamuriana vicompañeroanahi tayehe eta vématanerepianahi: ema Marcos, ema Aristarco, ema Demas, émapa ema Lucas.

<sup>25</sup> Nuyaseucharaca ema Viáquenu Jesucristo táetaviuchahíni eta iúricacarevaya máicha.

Tamu tupa.